

Untuk mengelakkan keraguan, versi asal Prinsip Bon Hijau dalam Bahasa Inggeris yang diterbitkan di laman sesawang ICMA merupakan versi rasmi dokumen ini. Terjemahan ini hanya untuk tujuan maklumat sahaja.

Prinsip Bon Hijau 2017

Garis Panduan Proses Sukarela bagi Terbitan Bon Hijau

2 Jun 2017

Pengenalan

Pasaran Bon Hijau bertujuan untuk mewujudkan dan mengembangkan peranan penting pasaran hutang dalam membiaya projek yang menyumbang kepada kelestarian alam sekitar. Prinsip Bon Hijau (GBP) menggalakkan integriti dalam pasaran Bon Hijau melalui garis panduan yang menyarankan ketelusan, penzahiran dan pelaporan. Ia disediakan untuk kegunaan oleh peserta pasaran dan dirangka untuk mendorong penyediaan maklumat yang diperlukan untuk meningkatkan peruntukan modal kepada projek sedemikian. Dengan memberi tumpuan kepada penggunaan hasil kutipan, GBP bermatlamat untuk menyokong penerbit dalam peralihan model perniagaan mereka ke arah kelestarian alam sekitar melalui projek tertentu.

Terbitan yang sejajar dengan GBP perlu menyediakan peluang pelaburan dengan kelayakan hijau yang telus. Dengan menyarankan agar penerbit melaporkan tentang penggunaan hasil kutipan Bon Hijau, GBP menggalakkan langkah ke arah perubahan dalam ketelusan yang memudahcarakan usaha pemantauan dana dalam projek berkaitan alam sekitar, dan pada masa yang sama bertujuan untuk menambah baik pandangan terhadap impak yang dianggarkan.

GBP menyediakan kategori induk bagi Projek Hijau yang layak dengan mengambil kira pelbagai pandangan semasa dan pembangunan yang sedang dijalankan dalam memahami isu-isu alam sekitar dan kesannya, pada masa yang sama menjadi perantara apabila diperlukan dengan pihak lain yang menyediakan takrifan, piawaian dan taksonomi yang saling melengkapi dalam menentukan kelestarian alam sekitar sesuatu projek. GBP menggalakkan semua peserta pasaran agar menggunakan asas ini untuk membangunkan amalan mantap mereka sendiri, dengan merujuk kepada set kriteria pelengkap umum yang relevan.

GBP bersifat kolaboratif dan konsultatif berasaskan sumbangan daripada Ahli-ahli GBP dan komuniti yang lebih meluas termasuk para Pemerhati, dan diselaraskan oleh Jawatankuasa Eksekutif. Pada kebiasaannya, GBP dikemas kini sekali setahun, sejajar dengan perkembangan dan pertumbuhan pasaran Bon Hijau global.

GBP EDISI 2017

Edisi GBP ini meraih manfaat input daripada rundingan Musim Luruh 2016 Ahli-ahli GBP dan para Pemerhati, serta daripada kumpulan kerja yang diselaraskan oleh Jawatankuasa Eksekutif GBP, yang terkandung dalam tema utama yang terhasil daripada rundingan tersebut. Ia juga memberi penekanan kepada memperluas kumpulan kerja bukan sahaja merangkumi Jawatankuasa Eksekutif GBP malah juga melibatkan peserta dengan kepakaran yang berkaitan dari kalangan Ahli-ahli GBP dan para Pemerhati. Kemas kini ini juga bertujuan untuk memperoleh maklum balas berterusan daripada komuniti pihak berkepentingan Bon Hijau yang lebih meluas dan mengambil kira perkembangan pasaran terkini.

Kemas kini 2017 ini masih dalam rangkuman empat komponen teras yang sama (Penggunaan Hasil Kutipan, Proses bagi Penilaian dan Pemilihan Projek, Pengurusan Hasil Kutipan dan Pelaporan). Penekanan juga terus diberikan terhadap kepentingan penggunaan templat yang disarankan yang meliputi kesejajaran penerbit dengan GBP dan kandungan semakan luaran yang boleh didapati di www.icmagroup.org/gssbresourcecentre. Edisi 2017 mengetengahkan pertumbuhan kematangan GBP secara menyeluruh dengan perubahan yang terhad berbanding edisi 2016.

GBP 2017 mengandungi pengenalan baharu. Kategori Projek Hijau dalam bahagian Penggunaan Hasil Kutipan dikemas kini dan dilengkapkan, dan gaya bahasa baharu yang bertujuan untuk mencerminkan inovasi yang diperkenalkan, termasuk yang berhubung dengan terbitan Bon Hijau berdaulat baru-baru ini. Penjelasan dibuat ke atas saranan bagi komunikasi penerbit tentang Proses bagi Penilaian dan Pemilihan Projek, dan Pengurusan Hasil Kutipan mereka. Selaras dengan kemas kini 2017 ini, garis panduan tambahan juga disediakan mengenai pelaporan impak, dengan metrik yang dicadangkan bagi projek kelestarian air dan sisa air.

DEFINISI BON HIJAU

Bon Hijau merupakan sejenis instrumen bon di mana hasil kutipannya akan diguna pakai secara eksklusif untuk membiaya atau membiaya semula, sebahagian atau keseluruhan, Projek Hijau layak yang baharu dan/atau sedia ada (sila lihat Bahagian 1 Penggunaan Hasil Kutipan) dan yang sejajar dengan empat komponen teras GBP. Terdapat pelbagai jenis Bon Hijau yang berbeza di pasaran. Ini diterangkan dalam Lampiran I.

Adalah difahamkan bahawa sesetengah Projek Hijau mungkin mempunyai manfaat sosial secara bersama, dan bahawa pengelasan bon melalui penggunaan hasil kutipan sebagai Bon Hijau hendaklah ditentukan oleh penerbit berdasarkan objektif utama bagi projek pendasarnya. (Bon yang menggabungkan projek hijau dan sosial adalah dirujuk sebagai Bon

Lestari, dan panduan khususnya disediakan secara berasingan dalam Garis Panduan Bon Lestari.

Adalah penting bahawa Bon Hijau tidak seharusnya dianggap sepiawai dengan bon yang tidak sejajar dengan empat komponen teras GBP.

PRINSIP BON HIJAU

Prinsip Bon Hijau (GBP) ialah garis panduan proses secara sukarela yang menyarankan ketelusan dan penzahiran dan menggalakkan integriti dalam pembangunan pasaran Bon Hijau dengan menjelaskan kaedah bagi penerbitan Bon Hijau. Matlamat GBP adalah untuk digunakan secara meluas oleh pasaran: ia menyediakan panduan kepada penerbit tentang komponen utama yang terlibat dalam pelancaran Bon Hijau yang boleh dipercayai; ia membantu pelabur dengan menggalakkan ketersediaan maklumat yang diperlukan untuk menilai impak alam sekitar terhadap pelaburan Bon Hijau mereka; dan ia membantu para penaja jamin dengan menggerakkan pasaran ke arah penzahiran yang dijangkakan yang akan memudahkan urusan niaga.

GBP menyarankan proses dan penzahiran yang jelas bagi penerbit, yang boleh digunakan oleh para pelabur, bank, bank pelaburan, penaja jamin, ejen penempatan dan lain-lain untuk memahami ciri-ciri mana-mana Bon Hijau. GBP memberi penekanan kepada ketelusan, ketepatan dan integriti maklumat yang diperlukan yang akan dizahirkan dan dilaporkan oleh penerbit kepada pihak berkepentingan.

GBP mempunyai empat komponen teras:

1. Penggunaan Hasil Kutipan
2. Proses bagi Penilaian dan Pemilihan Projek
3. Pengurusan Hasil Kutipan
4. Pelaporan

1. Penggunaan Hasil Kutipan

Asas bagi Bon Hijau ialah penggunaan hasil kutipan bon bagi Projek Hijau (termasuk perbelanjaan lain yang berkaitan dan perbelanjaan sokongan, seperti R&D), yang hendaklah dijelaskan sewajarnya dalam dokumen perundangan bagi sekuriti tersebut. Semua Projek Hijau yang ditetapkan hendaklah memberi manfaat alam sekitar yang jelas, yang akan dinilai dan, di mana sesuai, dinyatakan kuantitinya oleh penerbit.

Sekiranya semua atau sebahagian daripada hasil kutipan adalah atau mungkin digunakan untuk pembiayaan semula, adalah disarankan agar penerbit memberikan anggaran bahagian pembiayaan berbanding pembiayaan semula, dan di mana wajar, turut menjelaskan pelaburan atau portfolio projek mana yang mungkin dibiayai semula, dan setakat yang

relevan, tempoh semak kembali (*look-back period*) yang dijangka untuk Projek yang dibiayai semula.

GBP mengiktiraf dengan jelas beberapa kategori umum kelayakan Projek Hijau dengan objektif untuk memberi perhatian kepada bidang utama kebimbangan terhadap alam sekitar seperti perubahan iklim, penyusutan sumber semula jadi, kehilangan biodiversiti serta pencemaran udara, air atau tanah.

Senarai berikut merupakan petunjuk dan merangkumi jenis projek yang paling kerap digunakan, yang disokong atau dijangka akan disokong oleh pasaran Bon Hijau. Projek Hijau mungkin berkaitan dengan lebih daripada satu kategori. Kategori tersebut, tanpa mengikut susunan tertentu, termasuk, tetapi tidak terhad kepada:

- **tenaga boleh diperbaharui** (termasuk penghasilan, penghantaran, perkakasan dan produk);
- **kecekapan tenaga** (seperti dalam bangunan baharu atau dibaik pulih, penyimpanan tenaga, pemanasan daerah, grid pintar, perkakasan dan produk);
- **pencegahan dan kawalan pencemaran** (termasuk rawatan sisa air, pengurangan pelepasan bahan cemar ke udara, kawalan gas rumah hijau, membaik pulih tanah, pencegahan sisa, pengurangan sisa, kitar semula sisa dan sisa cekap tenaga/pelepasan kepada tenaga, produk tambah nilai daripada sisa dan pembuatan semula sisa, serta pemantauan alam sekitar yang berkaitan);
- **pengurusan kelestarian alam sekitar bagi sumber hidupan semula jadi dan penggunaan tanah** (termasuk pertanian lestari alam sekitar, penternakan haiwan lestari alam sekitar; input ladang pintar iklim seperti perlindungan tanaman biologi atau pengairan titisan; perikanan dan akuakultur lestari alam sekitar, perhutanan lestari alam sekitar, termasuk penghutanan dan penghutanan semula, dan pemeliharaan atau pemulihan landskap semula jadi);
- **pemuliharaan biodiversiti daratan dan akuatik** (termasuk perlindungan persekitaran pinggir laut, marin dan tadahan air);
- **pengangkutan bersih** (seperti elektrik, hibrid, awam, berlandasan, tidak bermotor, pengangkutan pelbagai mod, infrastruktur bagi kenderaan tenaga bersih dan pengurangan pelepasan bahan berbahaya);
- **kelestarian pengurusan air dan sisa air** (termasuk kelestarian infrastruktur bagi air bersih dan/atau minuman, rawatan sisa air, kelestarian sistem perparitan bandar dan *river training* serta lain-lain bentuk pencegahan banjir);
- **penyesuaian perubahan iklim** (termasuk sistem sokongan maklumat, seperti pemerhatian iklim dan sistem amaran awal);
- **produk, teknologi pengeluaran dan proses yang mengadaptasi konsep cekap eko dan/atau ekonomi kitaran** (seperti pembangunan dan pengenalan produk yang lebih mesra alam, dengan label eko atau perakuan alam sekitar, pembungkusan dan pengagihan cekap sumber);

- **bangunan hijau** yang memenuhi piawaian atau perakuan yang diiktiraf di peringkat serantau, negara atau antarabangsa.

Walaupun matlamat GBP adalah untuk tidak memihak kepada mana-mana teknologi hijau, piawaian, tuntutan dan pengisytiharan yang optimum bagi manfaat kelestarian alam sekitar, penerbit dan pihak berkepentingan lain boleh merujuk kepada contoh-contoh melalui pautan yang disenaraikan di www.icmagroup.org/gssbresourcecentre. Tambahan pula, terdapat banyak institusi yang menyediakan analisis dan nasihat bebas serta panduan mengenai kualiti penyelesaian hijau dan amalan alam sekitar yang berbeza. Definisi hijau dan projek hijau juga mungkin berubah bergantung pada sektor dan geografi.

2. Proses bagi Penilaian dan Pemilihan Projek

Penerbit Bon Hijau hendaklah memaklumkan dengan jelas kepada pelabur tentang:

- objektif kelestarian alam sekitar;
- proses di mana penerbit menentukan bagaimana Projek tersebut menepati kategori Projek Hijau layak yang dikenal pasti di atas;
- kriteria kelayakan berkaitan, termasuk, jika berkaitan, kriteria pengecualian atau proses lain yang diguna pakai untuk mengenal pasti dan menguruskan potensi risiko alam sekitar dan sosial yang material berkaitan dengan Projek.

Penerbit digalakkan untuk menempatkan maklumat ini dalam konteks objektif, strategi, dasar penerbit dan/atau proses berkaitan dengan kelestarian alam sekitar. Penerbit juga digalakkan untuk menzahirkan mana-mana piawaian atau perakuan hijau yang dirujuk dalam pemilihan Projek.

GBP menggalakkan tahap ketelusan yang tinggi dan menyarankan agar proses Penerbit bagi penilaian dan pemilihan projek dilengkapi dengan semakan luaran (sila lihat bahagian Semakan Luaran).

3. Pengurusan Hasil Kutipan

Hasil kutipan bersih daripada Bon Hijau, atau amaun yang bersamaan dengan hasil kutipan bersih ini, hendaklah dikreditkan kepada akaun sampingan, dipindahkan kepada portfolio sampingan, atau sebaliknya dipantau oleh penerbit dengan cara sewajarnya, dan disahkan oleh penerbit melalui proses dalaman rasmi yang dikaitkan dengan operasi pinjaman dan pelaburan penerbit bagi Projek Hijau.

Selagi Bon Hijau masih belum ditebus, baki hasil kutipan yang dijejaki hendaklah dilaraskan secara berkala untuk memadamkan peruntukan kepada Projek Hijau layak yang dibuat semasa tempoh tersebut. Penerbit hendaklah memaklumkan kepada pelabur jenis penempatan sementara yang dihasratkan bagi baki hasil kutipan yang tidak diperuntukkan.

GBP menggalakkan tahap ketelusan yang tinggi dan menyarankan agar pengurusan hasil kutipan penerbit ditambah dengan penggunaan juruaudit atau pihak ketiga lain, untuk mengesahkan kaedah penjejakan dalaman dan peruntukan dana daripada hasil kutipan Bon Hijau (sila lihat bahagian Semakan Luaran).

4. Pelaporan

Penerbit hendaklah membuat dan menyimpan maklumat terkini yang mudah didapati mengenai penggunaan hasil kutipan yang perlu diperbaharui setiap tahun sehingga peruntukan dibuat sepenuhnya dan sebagaimana diperlukan selepas itu sekiranya terdapat perkembangan yang material. Ini termasuk senarai Projek ke mana hasil kutipan Bon Hijau telah diperuntukkan, serta penerangan ringkas tentang projek dan amaun yang diperuntukkan, dan jangkaan impaknya. Sekiranya persetujuan kerahsiaan, pertimbangan daya saing, atau bilangan projek pendasar yang banyak mengehadkan amaun perincian yang boleh disediakan, GBP menyarankan supaya maklumat dibentangkan dalam istilah umum atau atas asas portfolio yang diagregat (contohnya peratusan yang diperuntukkan kepada kategori projek tertentu).

Ketelusan ialah nilai penting dalam memaklumkan impak yang dijangka daripada projek. GBP menyarankan penggunaan petunjuk prestasi kualitatif dan, yang mana sesuai, pengukur prestasi kuantitatif (sebagai contoh, kapasiti tenaga, penjanaan elektrik, pengeluaran gas rumah hijau yang dikurangkan/dielakkan, bilangan orang yang diberi akses kepada tenaga bersih, pengurangan dalam penggunaan air, pengurangan dalam bilangan kereta yang diperlukan, dan lain-lain) dan penzahiran tentang metodologi pendasar utama dan/atau andaian yang digunakan dalam penentuan kuantitatif. Penerbit yang berupaya untuk memantau impak yang telah dicapai digalakkan untuk menyatakannya dalam pelaporan berkala mereka.

Garis panduan sukarela yang menyasarkan rangka kerja yang harmoni bagi pelaporan impak tersedia untuk projek cekap tenaga, tenaga boleh baharu, serta projek air dan sisa air (sila lihat dokumen panduan di www.icmagroup.org/gssbresourcecentre). Garis panduan tersebut mengandungi templat bagi format pelaporan impak pada peringkat projek dan portfolio yang boleh disesuaikan oleh penerbit mengikut keperluan. GBP menggalakkan inisiatif lanjut, untuk membantu mewujudkan rujukan tambahan bagi pelaporan impak, yang boleh diterima pakai dan/atau disesuaikan oleh pihak lain mengikut keperluan mereka. Garis panduan bagi sektor tambahan sedang dibangunkan.

Penggunaan ringkasan yang mencerminkan ciri-ciri utama Bon Hijau atau program Bon Hijau, dan memberi ilustrasi ciri-ciri utamanya sejajar dengan empat komponen teras GBP boleh membantu peserta pasaran mendapatkan maklumat. Untuk itu, templat boleh diperoleh di www.icmagroup.org/gssbresourcecentre. Templat yang telah dilengkapkan boleh dimuat naik ke dalam talian bagi makluman pasaran (sila rujuk bahagian Pusat Sumber di bawah).

SEMAKAN LUARAN

Adalah disarankan supaya penerbit menggunakan semakan luaran untuk mengesahkan kesejajaran Bon Hijau mereka dengan ciri-ciri utama GBP sebagaimana ditakrifkan di atas. Terdapat pelbagai kaedah bagi penerbit memperoleh input luar dalam merangka proses Bon Hijau mereka dan terdapat beberapa tahap dan jenis semakan yang boleh dijalankan. Panduan dan semakan luaran tersebut termasuk:

- 1) Semakan Perunding: Penerbit boleh mendapatkan nasihat daripada perunding dan/atau institusi dengan kepakaran yang diiktiraf dalam kelestarian alam sekitar atau aspek lain daripada terbitan Bon Hijau, seperti pembangunan/semakan rangka kerja Bon Hijau penerbit. "Pendapat pihak kedua" mungkin termasuk dalam kategori ini.
- 2) Pengesahan: Penerbit boleh memohon Bon Hijaunya, rangka kerja Bon Hijau berkaitan atau aset sandarannya disahkan secara bebas oleh pihak berkeelayakan, seperti juruaudit. Berlainan dengan perakuan, pengesahan bertumpu kepada kesejajaran dengan piawaian dalaman atau tuntutan yang dibuat oleh penerbit. Penilaian ciri-ciri kelestarian alam sekitar terhadap aset sandaran boleh dianggap sebagai pengesahan dan boleh merujuk kepada kriteria luaran.
- 3) Perakuan. Penerbit boleh meminta Bon Hijaunya atau rangka kerja Bon Hijau berkaitan atau Penggunaan Hasil Kutipan diperakui menurut piawaian penilaian hijau luaran. Piawaian penilaian mentakrifkan kriteria, dan kesejajaran dengan kriteria tersebut diuji oleh pihak ketiga/pemberi perakuan yang layak.
- 4) Penarafan: Penerbit boleh meminta Bon Hijaunya atau rangka kerja Bon Hijau berkaitan diberi penarafan oleh pihak ketiga yang berkeelayakan, seperti penyedia penyelidikan khusus atau agensi penarafan. Penarafan Bon Hijau adalah berasingan daripada penarafan alam sekitar, sosial dan tadbir urus (ESG) penerbit kerana ia biasanya diguna pakai kepada setiap sekuriti atau rangka kerja/program Bon Hijau individu.

Semakan luaran mungkin dibuat secara sebahagian, meliputi hanya sesetengah aspek bon hijau penerbit atau rangka kerja Bon Hijau yang berkaitan, atau secara menyeluruh, dengan menilai kesejajaran terhadap semua empat komponen teras GBP.

GBP menyarankan agar semakan luaran tersebut, atau sekurang-kurangnya ringkasan eksekutif, dizahirkan kepada orang awam, contohnya dengan menggunakan templat yang boleh diperoleh di www.icmagroup.org/gssbresourcecentre. Templat yang telah dilengkapkan boleh dimuat naik ke dalam talian bagi makluman pasaran (sila rujuk bahagian Pusat Sumber di bawah). GBP menggalakkan penyedia semakan luaran untuk mendedahkan kelayakan dan kepakaran mereka yang berkaitan, dan menyampaikan secara jelas tentang skop semakan yang dijalankan.

GBP mengambil kira bahawa penentuan masa semakan luaran mungkin bergantung kepada penggunaan hasil kutipan dan penerbitan semakan tersebut mungkin terbatas oleh keperluan kerahsiaan perniagaan.

Pusat Sumber

Templat yang disarankan dan sumber GBP yang lain boleh diperolehi di Pusat Sumber di www.icmagroup.org/gssbresourcecentre. Templat yang telah lengkap akan disediakan secara dalam talian bagi makluman pasaran di Pusat Sumber dengan mengikuti arahan pada pautan di atas.

PENAFIAN

Prinsip Bon Hijau ialah garis panduan proses sukarela yang bukan suatu tawaran untuk membeli atau menjual sekuriti ataupun nasihat khusus dalam apa saja bentuk (cukai, undang-undang, alam sekitar, perakaunan atau kawalan selia) berhubung dengan Bon Hijau atau mana-mana sekuriti lain. Prinsip Bon Hijau tidak mewujudkan apa-apa hak dalam, atau liabiliti kepada mana-mana orang, orang awam atau swasta. Penerbit menerima pakai dan melaksanakan Prinsip Bon Hijau secara sukarela dan bebas, tanpa pergantungan atau rekursa kepada Prinsip Bon Hijau, dan bertanggungjawab penuh bagi keputusan untuk menerbitkan Bon Hijau. Penaja jamin Bon Hijau tidak bertanggungjawab jika penerbit tidak mematuhi komitmen mereka kepada Bon Hijau dan penggunaan hasil kutipan bersih yang terhasil. Jika terdapat percanggahan antara mana-mana undang-undang, statut dan peraturan terpakai dengan garis panduan yang dikemukakan dalam Prinsip Bon Hijau, undang-undang, statut dan peraturan tempatan yang relevan akan terpakai.

LAMPIRAN I

JENIS-JENIS BON HIJAU

Pada masa ini, terdapat empat jenis Bon Hijau (jenis tambahan mungkin terhasil apabila pasaran berkembang dan ini akan dimasukkan dalam kemas kini tahunan GBP):

- **Bon Penggunaan Hijau Hasil Kutipan yang Biasa:** obligasi hutang biasa dengan rekursa kepada penerbit yang sejajar dengan GBP.
- **Bon Hasil Hijau:** obligasi hutang tanpa rekursa kepada penerbit yang sejajar dengan GBP di mana pendedahan kredit dalam bon ialah kepada aliran tunai sandaran hasil daripada aliran hasil, yuran, cukai dan lain-lain, yang mana penggunaan hasil kutipan adalah untuk Projek Hijau berkaitan atau tidak berkaitan.
- **Bon Projek Hijau:** bon projek bagi Projek Hijau tunggal atau berbilang yang mana pelabur mempunyai pendedahan langsung kepada risiko projek dengan atau tanpa potensi rekursa kepada penerbit, dan yang sejajar dengan GBP.
- **Bon Bercagar Hijau:** bon dengan kolateral oleh satu atau lebih Projek Hijau khusus, termasuk tetapi tidak terhad kepada bon tertutup (*covered bonds*), sekuriti bersandarkan aset (ABS), sekuriti bersandarkan gadai janji (MBS) dan struktur lain; dan sejajar dengan GBP. Sumber pertama pembayaran balik biasanya daripada aliran tunai daripada aset. Bon jenis ini meliputi, contohnya, sekuriti bersandarkan aset bagi PV solar atas bumbung dan/atau aset cekap tenaga.

Nota:

Perlu disedari bahawa terdapat pasaran bagi bon bertemakan alam sekitar, iklim atau yang selainnya, dalam sesetengah kes dirujuk sebagai “*pure play*”, yang diterbitkan oleh organisasi yang sebahagian besarnya, atau secara keseluruhannya terlibat dalam aktiviti kelestarian alam sekitar, tetapi tidak mematuhi empat komponen teras GBP. Bagi kes sedemikian, pelabur perlu dimaklumkan sewajarnya dan perhatian perlu diambil untuk tidak mengimplikasikan ciri-ciri GBP dengan merujuk kepadanya sebagai Bon Hijau. Organisasi ini digalakkan untuk menerima pakai, di mana sesuai, amalan terbaik GBP yang berkaitan (contohnya bagi pelaporan) bagi bon bertema alam sekitar, iklim atau selainnya yang sedia ada, dan untuk menjajarkan terbitan masa depan dengan GBP.